

初學指南尺牘



盛興書局印行

初學指南尺牘

盛興書局印行

父在外寄子書


爾父在家。無生活計。不得已遠游外鄉。以求財利。因命運不辰。全無積蓄。空囊素手。難作歸計。無奈暫留。所望吾兒在家。爲人規矩。節儉治家。孝順爾母。則爾父無內顧之憂。倘在外經營。稍得如意。自當速回梓里。不須介意。茲付某鄉某人去佛銀若干元。到可收入。回信來知。餘言不盡。父字付兒某々

收知

某月某日書

子在家奉父書

因家清淡。以致



大人跋涉江湖。受盡風波之苦。不得晨昏奉侍。深望保重玉體。以免家人懸念。接讀手書。敢不遵命乎。伏願稍得資身。速歸故里。以承繞膝之樂也。信聞付來佛銀。已經照信收交母親大人。以爲薪米之需。茲因人便。特此叩請金安。不一

上

某月某日

父親大人尊前

不肖兒某稟

父在家寄子書

自爾出外以後。我心無時不切念。但願有利入手。切當粒積早歸。小立規模。長安雖好。非久居之地。身體務宜保重。家信必

是禱

(朋友之付)

須常寄。以免我有倚門之望也。家中老幼。幸獲粗安。毋庸掛慮。因使特此以達。

子在外奉父

遠走外鄉。不能在家朝夕侍奉左右。知有不孝之罪也。本擬稍得資身。即可奔回。以爲定省之計。但財利難得。無奈少留。斷不敢貪戀異鄉花柳而忘故土也。接讀嚴示。知舉家平安。不勝雀躍之至。深望

大人強飯增衣。則兒在外可無內慮矣。但恨身中如洗。未能多寄。以致家中有困乏之憂。茲特備佛銀六元。附寄某人帶回。到祈收入。回示是幸。上



父親大人膝下

某月某日

不肖兒稟

父 外 寄 子

老父備歷風塵。營求微利。無非爲爾輩計也。汝在家誦讀。務宜日夕辛勤。不可蕩檢踰閑。致生荆棘。汝弟亦應開導。莫使外出闕游。師訓雖不違忘。母儀尤宜敬奉。茲付銀幾兩。以收候用。待帳目討清。乘暇旋家。毋庸觀望。謹此特囑。

子 在 家 奉 父

大人屢歷風霜。羈留客邸。不得瞻依膝下。定省殊疎。兒心抱憾。前附銀回已收候用。母親固藉神氣清爽。諸弟亦賴平安。無庸掛慮。惟冀

大人愛身惜玉。稍暇卽整歸鞭。無使稚子候門。時切瞻依在抱也。謹此上稟

父病寄子

老父桑榆暮景。使汝外出營生。亦不得已事也。假使天佑衰年。力能調治。可無待汝瞻依。孰料近日適沾重恙。坐臥不安。屢次延醫。尙未見効。吾兒見字。卽速回家。免我懸望至囑。

兄外寄弟

愚兄久羈客舍。碌々風塵。不得敘天倫之樂。愚心甚戚々矣。猶幸賢弟在家奉養。双親料必福庇康寧。旅懷稍慰。至若姪兒年幼。尤當訓束維殷。家用浩繁。汝宜節用。此皆切要之言。

弟應牢記。玆附銀幾兩。照收候用。迨帳目收清。歸期可必。始得暢敘幽情也。謹此特達。

弟在家奉兄

某哥大人客旅風塵。備嘗艱苦。弟屢念及。不能左右代勞。酒食未將。墳窟莫奏。衷懷殊耿耿也。至姪兒在家誦讀。心地漸開。明基稍長。嫂々亦勤家務。日夕不違。是幸。

雙親年邁。皓首童顏。獨是日近西山。喜懼交集。我哥大人稍暇。速整歸鞭。以慰親心。是望是禱。

弟在外寄兄

睽別荆庭。遷流時序。自愧浪迹江湖。不得與吾兄朝夕侍奉。雙

親。同敦式好。殊覺罪戾難逃。惟是戲彩娛親。兄既竭誠弟可無仰事之憂矣。切思弟婦幼姪。事未通曉。望兄汪涵照拂。時切提撕。令弟歸期在卽。因此預申。

兄在家寄弟

分携兩地。不覺歲月屢遷。忽接吾弟音書。知客地平安用慰眷懷矣。弟雙親在堂。鞠子在念。冀吾弟點體在心。朝夕珍重。無貽親憂。倘貨帳稍清。卽圖歸計。俾家庭聚順。共快瞻依。慎毋以江山勝地。久戀他鄉也。閤家各賴平安。謹此附報。

夫在外寄妻書

以夫妻之情。分東西之影。每於閒暇之餘。未嘗不切念家鄉也。

但恨命不逢時。財利不能如意。故不得早圖歸計。伏望賢妻忍耐貧寒。撫養子女。則我可免內顧之憂也。暫候一二年。少得資身。自宜速回。不須介意。茲逢人使。付去佛銀幾元。到可收入家用。付息來知。餘言不盡。與賢妻某氏知悉。夫書

妻在家寄夫書

夫妻之情。本圖唱隨。但因家計困窮。而身分南北。每思風塵跋涉之苦。未嘗不神馳左右也。深望得意早回。以顧弱女幼男。則大幸矣。身體務宜保重。家信必須常寄。附某人來銀若干。已經收到。家中人亦皆平安。順此佈聞

夫君大人台電

拙妻某氏肅容

夫 寄 妻

夫客游異地。歇息他鄉。每懷家務。耿耿難忘。心神如醉矣。惟是白髮垂堂。幼子在抱。皆賴賢妻維持調護。不至

父母有不孝之責。子女有失教之方。想內助之功莫大。而恩莫測矣。回憶分袂以來。生意亦稍如意。本欲早圖歸計。但貨帳未清。歸期無定。待至某月某日。方能回家拜慶。茲付銀某兩。並某物幾件。漸備家用。照數查收。餘情面敘。

妻 寄 夫

夫邀遊異地。況瘁風塵。賤荆獨守閨房。芙蓉兩度開矣。憶握別後叮嚀細語。弗敢有違。至於白髮翁姑。承歡叔水。子女胥

賴康寧。良人可無掛慮。但

翁姑恒切門閭之望。子女常思膝下之依。更兼家用日繁。度支不足。倘獲微利。懇早回家。侍奉雙親。扶持子女。家室均感也。書不盡言。餘情面覆。

姊 嫁 寄 妹

綠窓握手。倏爾于歸。骨肉深情。擊懷未已。賢妹在家。須勤刺繡。蘭閨謹守。姆訓仍遵。頽惰自甘。拋荒機杼。溫柔淑慎。敬爾威儀。至若服侍雙親大人。務宜承順。堂前兄嫂和氣相將。果佩吾言。雖身隔雲山。心無掛慮。歸寧在卽。相會有期。切勿擊懷減膳也。謹此至囑。

妹 寄 姊

愚妹靜守綠窓。離愁滿服暮雲春樹。時切懷思。夢寢間不覺神馳左右也。還幸

雙親福履綏和。兄嫂幼弟。舉家豫順。遙望姊々加餐保體。無以分離爲念。倘翁姑事暇。早告歸寧。俾故里重逢。婦工復展。得以暢敘衷情。曷勝慶幸。

妹 嫁 寄 姊

妹自適歸。一庭和順。祖宗拜別。母命仍遵。獨是睽別高堂。分離吾姊。天南地北。聚首無期。妹心裏悵快也。茲承懿訓。不敢偶違。婦道固宜凜遵。品格仍期柔順。伏冀姊々無煩過慮。不

勝抃舞。謹此復候。

祖父在家寄孫書

遠方求利。人生分內事也。若能粒積速回。創立家業。卽家門有幸矣。少年在外。當知盡心經營。何患無振作之日哉。爾祖父今已年老。旦夕惟汝是念。切勿久住他鄉。致有在家倚闥之望也。在外身體。宜自珍重。書信常寄。以慰老心。因便特此示知。餘言不一。此示祖父字付孫收知。某月某日書

孫在外寄祖父書

遠走他鄉。不得朝夕定省。惟有望風遙祝。祖父大人玉體康健。爲慰。接讀

尊諭。自當遵守訓誨。但因囊空如洗。未得歸奉甘旨。幸祈加
饗自攝。庶免遠念經營。稍得如意。卽要奔歸。不須介懷。茲特
寄上佛銀幾元。到祈收入。回音示知。此稟上。

祖父大人尊前

不肖孫某稟

弟在外寄姊書

弟遠寄外地。不獲在家奉侍父母。自知有不孝之罪。身雖在外。
而心無時不切念家鄉。伏望吾姊不時回家省視。父母則游子
之心。庶可少安矣。在外稍得蓄積。自當奔歸。久寓他鄉。亦非
所願也。遙想吾姊。舉家定獲安康。弟雖在外。未嘗不仰天遙
祝也。茲因人便。特修此信。專候安好。並付佛銀四元。以充茶

菓之需。餘言不一。上

吾姊大人台電

弟具

姊在家寄弟書

不見吾弟經年餘矣。每當揚帆返棹之時。未嘗不明望榮歸也。老親在鄉。俱獲安康。姊思念吾鄉無時或忘。爲人子者。自宜體念親心。不可久寄異地。茲接來信。知客體清安。不勝喜悅。寄來佛銀四元已經收入。爾姊家中大小。亦俱獲平安。毋庸掛念。今因羽便。特此回復。餘言不盡。與

弟收知

愚姊具

伯叔
在外寄姪書

吾姪在家。已經稍長。爲人切宜和順。理家亦當節儉。無事之日。必順在館讀書。知書識禮。亦不致久在人下也。伯叔因欲求微利。無奈遠託他方。若得有資身。自當速回安頓。久住他鄉。非我所願也。幸叨天眷。得獲清安。不預掛意。今因人便特修寸楮達情。並附佛銀四元。到可收入。以爲紙筆之需。餘言不既。與姪某々收知。

月 日

愚伯書

姪在家奉伯叔書

語云。在家日々好。出外朝々難。此言深可信也。以大人年老

之時。而託身外域。若得有餘。切宜早回故鄉。創立家業。亦可
教誨姪輩之愚頑也。接讀尊札。知玉體康健。舉家欣慰。附來
佛銀兩元。已經拜領。茲特修書請安。並祈保重家中平安。毋
庸遠念。餘不盡稟。上

伯
叔大人尊前

姪某叩稟

外孫在外寄外祖父母書

外孫因清事清淡。遠方求利。不得在家常時請安。惟有叩祝蒼
天。庇佑

老大人安享清福而已。本欲回鄉省視。以盡寸心。但碍囊裏羞
澁。以致久羈他鄉。茲因羽便。聊修寸楮請安。並付佛銀十元。

以爲茶菓之敬。到祈笑納。並懇回示是荷。上

外祖父母大人尊前

愚外孫叩稟

外祖父母在家寄外孫書

吾孫欲求微利。而往外鄉。所望專心經紀。得意早回。勿戀
異地花柳。而忘父母之邦。卽家人之萬幸也。外出之人。保
重身體爲要。免爾父母煩念。至於家信切須多寄。萬勿放蕩。
乃不愧男人之志氣也。接來信以知在外平安。不勝喜慰。付
來佛銀十元。亦已收入。茲特修信達知。與賢外孫收。

外祖書

母舅在家寄外甥書

江山遠隔。離別多時。不勝擊懷。惟望外地經紀。得意當歸。建置家業。以成男子之志也。至於身體切當隨時保重。以免爾父母遠掛。則幸甚矣。異鄉乃求利之地。非久屆之所。惟望賢外甥當以家鄉爲重焉。茲因鴻便。修信遠情。千祈保重身體。早作歸計。餘無多囑。與賢外甥收知。

劣母舅書

外甥在外寄母舅書

尊顏違別。勿經幾載。故鄉之念。何日忘之。想大人邇來定多納福。以慰鄙懷。甥自外出以來。因時運不濟。命途多舛。竭力經營。而無利可獲。是以未得速歸。且俟來春。若有餘資。卽當返旆旋歸。以受鴻誨。奉讀來諭。敢不遵依。又詢悉

尊體清吉。不勝喜慰。茲特修書拜別金安。並付佛銀一元。以爲茶菓之需。餘言不盡詳稟。上

母舅大人尊前

愚外甥稟

婿在外寄岳父書

山河遠隔。久疎侍教。不得盡父子之情。但冀大人因時康泰。使婿在外安心無慮。則厚幸矣。但愧命不逢辰。諸多不遂。無可積蓄。倘得稍々順遂。即使歸家。無須遠掛家中清淡。深蒙照拂。未知何時得以圖報萬一。茲特修緘。拜請全安。千祈保重。並附佛銀幾元。少申微意。餘容續申。上岳父大人尊前

愚婿某名拜稟

岳父在家寄女婿書

遠托異鄉。客心寥落。當此隆冬之時。務須強飯加衣。順時珍攝。若稍如意。切思早作歸計。上養父母。下蔭妻兒。勿以異鄉久戀不歸。則高門有慶矣。人生富貴不歸故鄉。亦何異衣錦夜行乎。

賢婿素本明理。必以父母之邦爲致意也。接來手書。知在外平安。不勝欣慰。付來佛銀幾元。亦經收入。小女外孫自當不時巡顧。因便特此達知。餘言不旣。與

賢婿某官台覽

愚外舅姓名書

姊夫在外寄小舅書

奔走遠方。未由時敘情話。每於風瀟雨晦之際。未嘗不思念故鄉。但恨命途多舛。圖利維艱。無奈暫留以圖機會耳。想賢舅在家。未遂天倫之樂。真相去天淵也。苟得餘積。自當迅速歸家。斷不以異鄉爲久居之所。令姊同諸甥衣食不接。千祈鼎力照拂。不勝銘刻。薄具佛銀幾元。伏乞查收是荷。

賢舅台電

愚姊夫上書

小舅在家寄姊夫書

遠違顏範。時切馳思。榮歸之望。無日不切。復望得利早回。以樂天倫。弟在家遊手。正是清淡過日而已。家姊外甥自當敦篤親愛。無須遠掛。接來台札。捧讀之下。宛如面諭。附來佛

銀幾元。亦經收領。今因鴻便。特此問候。千祈保重是幸。上

姊夫大人台電

愚內弟書

姑丈在外寄內姪書

遠隔關山。弗時獲敘寒溫。張無殊甚。乃因造化不遂。空囊素手。難以言歸。以致家中盼望。且看一年半載有利可獲。當卽言旋。豈敢遂忘故土也。遙想賢內姪爾來在家。必獲厚利。勝我風塵多客矣。茲因羽便。特此達知。與賢內姪某官台電。

劣姑夫書

內姪在家寄姑夫書

不瞻顏範。忽已三秋。想大人以經濟之才。求利遠方。諒必腰

纏萬貫矣。伏望早日榮歸。勿以外鄉爲久居之所。則幸矣。家姑懸望錦旋。暨諸表弟亦甚切囑。幸祈留意。接讀翰教。知玉體康泰。不勝喜慰。茲因鴻便。專此奉覆。上

姑丈大人台電。

愚內姪拜稟

在外托帶家書

弟離家數月。本欲速旋。但客帳牽連。未能歸家拜慶。屢欲修書回舍。恨未得人。今聞返旆在卽。與敝處相連。敢將家書逸付。倘駕到府之日。煩交草舍。俾家父知遊子之有方。免致倚門而望。不勝憾德矣。

回書

旅中晤會。屢沐青垂。股肱相寄。況家書修重。敢不小心。無致遺失。倘歸鞭偶息。卽日踵府。以報平安。無庸掛慮。專此復候。

在外托帶家書

小兒客遊某地。爲口奔馳。已有數月。未見歸期。近聞足下必經到此。方與小兒相違不遠。茲托家信一緘。敢祈帶至詢交。俾小兒始知家中景況。舉家均感也。謹此專望。

回書

令郎遠遊某地。預知財發萬金矣。近日必到此方。正屬他鄉遇故人。不勝欣慰。何可勝言。叨承尊信過托。倘到該處之日。

當面親交決不延緩。此覆

寄家書

自足下榮歸故里。特修一書。寄回家裏某人。倘尊駕抵里。祈
卽命价轉交。無致遲滯爲荷。外其程儀。少申微敬。幸勿見却
爲盼。

回書

客中會聚。極沐青垂。茲以家書着帶。何敢遲緩。弟一抵家。
卽着人送至府上。無勞尊慮。降儀璧謝。祈爲收納是荷。

借銀

四壁蕭條。寒儒浩歎。黃金消盡。壯士無顏。茲者時逢困乏。

素手無依。切念足下腹心相契。手足情關。而且家有餘貲。解推夙著。諒此些需必不見拒。故敢修書直告。暫移銀幾兩。以救燃眉。倘蒙金諾。頓令涸轍旋醒。深荷西江之水矣。待至某月定必如數奉償。不忘周急之澤。千祈原宥。幸勿爲推。

允借銀書

契濶已久。未得盤桓。不勝愧悔。叨蒙翰示云々。此不遇盤根錯節。偶爾暫常。

足下豈長此終窮乎。弟屬在知己。有無自可相通。敢云羅漢沈波。不能相救。況弟與足下手足腹心。情何能契。茲承尊命。謹傾囊奉上。以盡知己之情。希爲見納。幸勿以朱提薄物斤

々介意也。草々不恭。恕不親饋。

借銀

非屬深交。不敢啓齒。今弟有一緊事需銀救急。適奈束手。無計可施。切念

足下囊橐有餘。取携甚便。特奉一音。敢求借銀幾兩。以濟燃眉。容弟數日。如數送還。決不爽約。銘謝不忘。餘容面剖。

不允借銀書

緩急相通。吾人首重。通財大義。友道宜然。況弟與足下休戚相關。更當移易。奚敢故爲推諉。而不傾囊以與哉。但近來家用浩繁。時逢拮据。是以未得如命。謹復一音。望祈原諒。幸

勿以寡情之罪責我也。謹此佈達

借銀買貨

弟血本無多。平素將銀取貨。茲到埠沽得某貨。容欲索銀取完。方肯抵價。弟不自揣。特許成全。但自下傾囊而與。尙欠些需。因念仁兄惠愛良多。諒能周急。定然相信。故特遣奉札求借銀幾兩。千祈錫僉。俾得藉沽微利。刻期如數送還。決不爽約。是望是禱。

有借

天下豈少良友。而知心無幾。舊好如兄。寧敢自私所有。而使有棄予之歡乎。雖弟家淡薄。儲蓄無多。而搜囊以獻。庶表愚

忱。今其絲銀幾兩。統祈笑納。並請

日好不一。

借 粟

足下與僕休戚原屬相關。有無還期共濟。茲因絕糧。祈借穀數石。以資金匱之需。然晉饑而秦齎糧。及秦饑而晉閉糶。亦有用情如是者。足下豈肯効此耶。

有 粟 借

足下情如膠漆。憂樂同分。區々升斗之糈。安忍自私己有。而坐視不顧乎。雖無千倉萬箱之儲。而藏膳以輸。亦堪共濟。祈亟催舟而來。弟斷不效夫晉之閉糶也。速此謹達。

回 允 借 粟

得接瑤函。始知足下有庚癸頻呼之慘。弟與台駕非等路人。寧至等哀鴻之無托乎。弟今歲實獲無幾。但休戚相關。奚敢自私所有。敬承尊命。卽付粟幾石。祈爲查收。幸勿斤斤以相還爲累也。

回 不 允 借 粟

來諭洞悉。所云歲自饑荒。有在陳之困。但弟與閣下相隔非遙。今歲時大都如此。諒兄素所稔知。茲承尊示。暗籌底事。適當范甌生塵。同遭此苦。愧無以答。殊深悵々。謹修片牘復聞。祈向別圖。方命之非。統祈恕宥。諒無怪弟薄情。應有同

病相憐景況也。餘容面釋。

賒貨

屢蒙提助。五內常銘。茲弟店生理。雖有蠅頭微利。爭奈本短難支。全望

仁兄見信。暫取某貨幾多。價銀多寡。賜單付來。容弟數日速備。如數送還。將來歷久啣恩。不啻常處之下矣。端此謹達。

回允賒

自古懋遷得地。無有相通。交易場中。只憑信寫。蒙兄光顧。久仰忠誠。奚敢復萌推却。今遵命取貨付回。附單呈閱。祈照查收是望。

回 不 允 賒

得接來諭。敢不俯從。但近日貨稀價重。較去日有霄壤之隔。況小店發兌將清。所剩無幾。故不當奉命。祈爲見諒。另圖別策。是禱。

寄 貨 托 賣

足下逐利中原。定能億中。知不同弟守株待兔也。茲弟屯積某貨。意欲附駕並効長驅。奈蝟務羈身。不能如願。今將某貨附來。特請貴伴代弟發清。價值低昂。隨時估去。有所不論。並祈乘便附銀而回。不勝感德之至。肅此。順候 崇禧不一。

回 書

承命代估。時值價豐。正

足下時來風送之際也。賀々。該價單存。並將實銀幾兩一概附回。足下若再整長征。奇貨可居。弟早爲之預卜矣。復候吉祺不既。

討 帳

昨蒙光顧。尙該銀幾兩。屬在知交。不應速扣。但本短營生。轉環未遂。故不惜面垢懷慙。敬具片詞。敢求賜復。諒足下決不吝此餘貲。以救弟燃眉之急也。謹此直達。

答 書

捧誦手教。爽約之罪。百喙無詞。然非敢故爲推諉也。不料命

寒時乖。青蚨未就。迄今窮廬困守。計屈難伸。伏望淵涵。並祈寬約。容弟三旬。迨禾稼既成。速備奉還。無煩玉音再至也。是所厚幸。

邀友舟行

錦城花柳。大有可觀。終歲窮經。寧無抑鬱。茲見某地風光明媚。景物宜人。弟現買舟欲往。奈無知己以寫襟懷。聞足下破浪情深。臨流念切。敢邀同棹。得藉餘光。但艣人帆欲張矣。未知允否。煩卽示知。俾繫舟以俟。勿使江濱獨樂。空歌桂棹蘭槳也。是幸。

邀友觀競渡

節屆端陽。人思奪錦。旗飛彩電。鼓振神鼙。與波上下。亦偉觀也。茲聞某處某日。快覩龍飛。爭看競渡。遊人甚衆。弟往觀乎。現偕二三同志。具蒲觴角黍。桂棹蘭漿。尅期解纜。倘足下不棄。祈卽賁臨。以便酌酒臨流。賞心物色。一弔屈原勝景。一敘吾輩幽情。曷勝欣躍乎。

邀友看戲

觀風問俗。不廢輶軒。美景良辰。當留心目。茲敝處大演梨園。雖不敢謂元者娜々。大雅洋洋。然妙曲清歌。無不可爲觸目警心之助也。敢攀足下賁臨。俾得先生九席。對景懷情。不勝厚望。

回不來

盛境梨園度曲。神人同樂昇平。誰不敢於熱鬧場中。快覩熙和景象也。但弟賤冗久羈。未遑趨赴。嘉招盛意。五內常銘。逆命不恭。希求原宥。容俊餘閑。踵府面謝。不戢。

中秋邀飲

天上月圓。人間秋半。冰輪皎潔。桂影搖疏。一幅清光佳景。正當無負空明也。茲敬潔罇杯。放懷良夜。但庭有佳月。座無佳賓。何申雅意。敬攀足下過我茅齋。俾得吟風弄月。適性怡情。聊助庾亮登樓之興。幸勿見却。是望。

回書

時維八月。節屆中秋。月色宜人。桂香入夢。誰不欲泛仙槎而遊太虛之府。想兄台自命不凡。而蟾宮在望。早卜桂枝之折矣。獨弟性品凡庸。安能助庾亮登樓之興。叨承寵招。敢負情光。卽當赴命。無煩再辱。餘情面敘。

請銀會

弟近日維持一事。自愧囊空。蒙好友勸成幾兩銀會一箇。遞年充回。迄今份數恰足。茲特挽仁兄增入一份。情屬舊好。故敢強邀。倘蒙金諾。藉庇事成。感德不淺。敬具粗柬佐函。以候福安不一。

答書

接得兄台喜事纔來。健羨不已。命人會份。弟雖財乏。豈敢固辭。倘會敘實期。再賜玉音。俾卽携銀赴席是復。

請會酒

前蒙列尊賜顧。集腋成裘。聯成一會。感恩不淺。今本月某日。當值會期。屬在知心。恕不走柬。千祈是日親臨一敘。以便投領。是禱。

求友探貨價

弟碌々無能。窮廬靜守。大不如仁兄之得雲雨而興。已非池中物也。茲弟欲將附驥。利覓蠅頭。以期糊口。煩仁兄探實某貨若干。早賜玉音。若遇奇貨得時。皆賴玉成之德矣。並請午

安不一。

回書

足下家貲豐厚。何必壟斷是求。然名利兩途。人生大計。今承命探得某貨。價值相宜。祈早日裁奪。乘利而往。可爲奇貨。餘不盡述。順候晨安不既。

求友引薦

足下交遊日廣。財就名揚。固知天下無人不識君也。獨弟寡合交疎。守株待兔。反欲依人門戶。求進無由。今望足下代訪知心東主。幸爲先容。若得駐足安身。雖沒世不忘厚德矣。並請崇禱不一。

回書(一)

得接手諭。知足下欲爲世用。小試長才。足稱大志。承命訪某墟某街某店。用人甚亟。已薦爲股肱之任。舉皆允悅。但未知尊意合願否。祈卽移玉親臨。面議酌奪。是望。

回書(二)

足下忠誠素著。何地不容。茲誦來諭。欲市井間。小試所長。此特降格相從。亦行權之志耳。弟往訪大行商。皆有舊好伙伴。其餘枳棘之樹。非鳳所棲。百里之區。不堪展驥。足下有志世用。待來春需才之候。別有良圖。揣此佈復。

諫友酒色

昔大禹疏儀狄。晉文却南威。雖王公猶嚴節戒。豈小民而可沈溺其中乎。足下風流逸致。繁華場中。知難割愛。獨不忘恣情肆欲。嗜酒貪花。非特財業消磨。家室可慮。獨恐痴戀忘身。孤樹將枯。不堪雙斧砍伐也。千祈節性防淫。迷除早醒。矢志遠大。勿墜家聲。心邇人遠。不勝翹企之至。

諫友賭博

足下冠世才能。英風煥發。足以有爲。近聞足下生理不務。崇信奸徒。雙陸是依。好爲孤注。得無操必勝之術。以爲營生長策乎。如以爲然。則披星戴月之人俱愚。而賭博場中之人盡智也。然試思塵市間成立者。不知幾許。弟未見呼盧喝雉能

使家饒戶足也。伏望速轉迷途。猛然奮志。將來富敵陶朱。自
可爲之預卜矣。

賀友新婚

碧桃含笑。翠柳舒眉。知足下金屋藏春。繡幃香滿。何樂如之。
茲者新婚燕爾。固知琴鳴瑟應。于歸之淑女。四德堪誇。還喜
鳳友鸞交。天合之良緣。百年可定。弟應堂拜賀。而媚務未遑。
明月三五夜。拉良朋秉燭來遊。當共慶新婚佳景也。今敬具
錦聯佐函。遙申賀悃。祈爲莞納是荷。

又

足下新婚伉儷。永締良緣。遙想洞房花燭。含譽交歡。倚馬乘

龍。琴瑟好合。自有一番佳景矣。在弟忝屬知交。爲君欣羨。無以言情。今具菲儀。聊供內助之賀。望足下萬勿笑其不腆。是幸是幸。

回書

弟近日完娶。聊慰井臼之勞。敢謂鷄鳴之好。而足下過爲譽美。大錫隆儀。受之得無愧乎。茲對使拜登。銘心不淺。薄具蔬酌。酬謝嘉賓。千祈惠然。俾弟得增花燭之光也。幸甚。

賀人生子

近聞足下石麟獻瑞。玉樹呈奇。不必驟聽啼聲。知爲英物。而他年懸弧有志。雲路高攀。其所以光華門者。正未可量也。今

具菲儀。聊賀弄璋之慶。千祈笑納。不勝欣幸矣。

回書

寒門托庇。昨獲添丁。弟恐福薄德衰。一如景升之兒。未能興宗昌後。適足貽羞長者耳。茲荷兄臺美譽。抱愧何當。厚貺寵頒。拜領容謝。千祈見宥。感夕。

賀娶媳

近聞足下種就虬松。攀龍舞鳳。佳偶百年。預知膝下承歡。庭前藹瑞。他日態熊叶夢。麟趾呈祥。更大可爲新翁之慶矣。今弟適因賤冗。拜賀未遑。薄具聯扇粗品幾色。聊助新婚之慶。千祈勿却。待弟改日踵府調喜。幸甚。

回書

清淡家風。豚兒受室。不過父荷完子債耳。敢謂百輛盈門。足攀珠履乎。茲蒙譽美。深荷注存。厚禮敬登。感恩無盡。薄具萍酌一筵。稍申謝意。足下所卽賁臨。寒舍生色。幸勿吝玉感々。

賀新開店

足下智惠過人。春風滿座。而宏開寶肆。聊寄市塵。貨想物盈虛。屢能億中。陶朱之富。指日可期。今某夕等。薄具花紅全副。某品數色。預爲贊賀。幸勿見却。是幸。

回書

蹉跎歲月。名利無成。住苒居諸。技能莫錄。今滿開小肆。聊以歲身。常愧笑倚市門。貽羞壘斷。敢望陶朱之想哉。叨承青顧。拜領勿忘。倘羞給覆殮。深荷大德。容日面謝。

探友病

睽別良久。恨不得追隨步履。與兄同居憂喜也。近聞玉體違和。偶沾微恙。延醫調護。諒有良劑。未審一豎子驅逐淨盡否。且暮間能加餐否。弟寢寐不安。懷思倍切。若得力健神恬。興居氣爽。則予憂庶稍釋矣。近欲登堂侍側。而賤冗旋羈。只得佈函申候。還祈慎保尊軀。不勝翹企之至。

慰人喪父

尊公皓首童顏。足稱矍鑠。竊卜其眉壽無彊也。不意蓉城詔促。竟赴修文。弟深痛悼。況足下罔極恩離。椿庭靜寂。能不傷肝裂膽乎。然尊翁壽高福厚。生順死安。雖思暮情深。應亦破涕而爲笑。願足下節哀慎重。能守身以終制焉。斯亦孝思之匱矣。附具瓣香致尊。順候苦次。不盡。

慰 人 喪 妻

足下琴瑟靜好。婉戀閨房。早知內助良媛。當與君子偕老矣。不謂夢遭炊臼。錦破釵分。人生大不幸也。弟深爲痛惜。轉念死生有命。修知無常。慎毋絃斷堪傷。歡絲桐之失偶。淑姬有侍。無虞寂寞守孤房。還願足下善聽鼓盆之歌。毋癡念寐第之歡。

焉已耳。出函佈候。不宣。

慰人喪子

足下積功施德。反然殃及嗣君。誠天道難測。而神道難明矣。然愚者怨天。達人知命。故喪明知過。惜淚卽以惜身。弟時深仰企焉。伏望兄下納諫如流。安懷受命。他朝五桂頻來。八龍爭長。方知晚放遲花。始信予言之不謬也。謹此佈憶。

民國 92 年
教育部補助

中華民國三十四年十月二十日印刷
中華民國三十四年十月二十三日發行

指南尺牘

臺北市日新町二丁目一〇

發行者

王

清

焜

印刷人

陳

圭

臺北市宮前町五四

印刷所

藤

圭

印

刷

工

廠

臺北市日新町二丁目一〇

發行所

昌

明

誌

社

臺北市永樂町二丁目二二三

發售處

盛

興

書

局

國家圖書館



002855618

A200

民國三十五年八月八日(庚午)



黃 博 三